

Täkarde ta iktäb Buləs i-käl-Gälasya

Āšajəš

¹ A-wa näkk Buləs wa s-tumast-net i-änämmašul wär dd-təfel tärha n-ägg-adəm, wär has-dd-issəbäb däg ägg-adəm wäl' iyyän, Mässinäg-i n-Abba dd-issənkärän șisa Älmasesx jer-inəmmuttan d-șisa Älmasesx iman-net a hi-äsnäfränän i-ämašal-wen-däg.

² Āhuuläg-käwän-in, näkk d-ayətma-g wi gur-i-t-əllänen där-oharäg immun s-Emäli șisa Älmasesx a hawän-in-əktabnen käwaneđ-i hänen älkänisäten ti n-Gälasya.

³ șttaräg s-Mässinäg-i n-Abba-nänäg d-Emäli-nänäg șisa Älmasesx a käwän-ikfän ännygmät d-älxer.

⁴ șisa Älmasesx, iman-net a ikfa i-ad-nəjrəw tenäşše n-ibäkkadän-nänäg, ištäf-anäg däg-a-wa läbasän fäll-təglä addunya, äzzehäz-anäg-dd d-iman-net, ənta-den-däg a-wa ihan erhet n-Abba-nänäg Mässinäg-i

⁵ änihadjän härkuk d-təmmal. Amin!

Täqqän n-exäf n-Buləs däg-isälan n-käl-Gälasya

⁶ Käwaneđ ya təjraw-ahi täkunt n-armuđ wa där-täqqäläm darät wa käwän-dd-iğrän s-ännygmät-net i-ad-təlkəmäm i-Ālənžil iyyän säl wa-net.

7 Äyyät-ahi ad-käwän-sölmədäg a-s wär t-illa ar iyyän n-Älənžil, a t-ämoošän wa n-Älmasex. He käwäned, wär toyyem erk äddinät wi tattärnen tikärras-näwän, samäskalän-awän Älənžil wa n-iyyän iha elxəllas.

8 Ənneğ-awän: ere käwän-dd-osän, kud-irha umas iyyän däg-näg wäla änjalos dd-ifalän išənnawän, ad-hawän-ixatṭab Älənžil säl wa hawän-näxtäb, inzäy-t Mässinäg.

9 A-wen, äru d-hawän-tän-nənnä, nəjann'-awän-t day ämära, ere hawän-ixtäbän Älənžil säl wa n-iyyän hawän-näxtäb, täqbäläm, inzäy-t Mässinäg.

10 Ämära, ajän dägg-adəm a-s tattäräg ad-əkrəšäg idəm data-sän mey Mässinäg? Fäw! Mey tordam a-s tattäräg ad-żəjrəżäg iman-in i-dägg-adəm? Fäw! Ənnär tattäräg ad-żəjrəżäg iman-in i-dägg-adəm, wär tumasäg akli ix-damän i-Älmasex.

İmmək wa s-ikfă Mässinäg tənnəmuşəla Buləs

11 Ayətma, əlmədät a-s Älənžil wa hawän-näxtäbäg, wädden a dd-ikkas ägg-adəm däg-exäf-net,

12 wädden äwadəm a hi-t-issäqbälän, wäla äwadəm a hi-t-issäğrän, YisaÄlmasex iman-net a hi-t-dd-äsnäfalälän i-ad-t-əfhəmäg.

13 Darät-a-wen day, han-käwän isälan n-a-wa s- käla t-heğ ibda a-s əlkamäg i-äddin wa n-käl-Älyähud. Äqquzzäbeg älkäniśät n-Mässinäg s-a-wa äddobeg iket-net, wär t-illa a äsidärhänäg ar ad- tät-in-aləmäg fäll-ärori n-äkall.

14 Āzzāman-en, ojäräy imigdähän-in däy-tumast-in uđef n-ăddin wa n-käl-Ālyähud, ojäräy-tän s-a äjjeen däy-tärha n-igguż n-älğadatän wi hanäy-dd-oyyän imärawän-nänäy.

15 Mäšan, Mässinäy, däy-tärha ta hi-ija, äsnäfrän-ahi härwa wär-əwey, osä-dd ašäl wa issəbdäd i-a-wen ɣas, iɣr'-ahi-dd s-iman-net däy-annuymät-net i-ad-umasäy akli-net,

16 äsmäqqäs-ahi d-Rure-s wa dd-ifälän išənnawän i-ad-ajäy isälan-net i-inəzzulam.[†] Ija a-wen ɣas, egley, wär t-illa ere däy-əttaräy addäbara n-a-wa wäla a-wa.

17 Wär-əkkey wäla Yärussälam i-ad-däy-s ənməzzəyäy d-meddən wi hi-azzarnen s-tumast n-inəmmušal, əkkey ăkall wa n-arabän, təzzar, ăqqäläy-dd aɣrəm wa n-Dämašäq.

18 Şamad okayän kärad iwətyan ədarät-a-wen-däy, ad-əkkey Yärussälam, ănmäzzayäy d-Betrus-i ɣur-ăzzubbej har jey märaw išilan d-səmmos.

19 A-wa säl ənta-en-däy, wär-ənheyäy däy-inəmmušal ar Yaqub wa n-ăŋŋa-s n-ɻisa.

20 Isälan-wi-däy hawän-in-kattäbäy, Mässinäy a-s tajuhe-nin, tidət wädden bahu.

21 Fäläy dihen ɣas, əkkey tajiwén ti n-Surya d-Silisi.

22 A-s itäjj a-wen-däy, wär käla ənhäyän ălmässexitän wi əzzäyñen teje ta n-Ālyähudəyät

[†] **1:16 1:16** – Yur-käl-Ālyähud, ere wärän ămoos ägg-Ālyähud s-aläşäl mey ere wärän ilkem i-ăddin-năsän, iket-net, ănăzzalim a ămoos. A-wen-däy a fäl tiwsaten ti iyyädnen iket-năsnät, ti n-inəzzulam. — Ašäl-i-däy, ănăzzalim, ăkafär (ere wärän issen s-Mässinäy).

idəm-in,

²³ mäsällät ḡas a jän n-a-s āhaləs wa s-käla itiḡəzzəbut ḥlkānisät, ənta-da-däg āmāra s-ənta iman-net a ixatṭābān immun wa s-käla itattär ad-t-in-aləm fäll-ärori n-äkall.

²⁴ Ad-timələn Mässinäg däg-təssəba n-a-wa hija.

2

Āmašal n-Buləs s-ayrəm wa n-Yärussālam

¹ Märaw iwətyan d-əkkoż darät-a-wen-däg ad-oläsäg ajozi s-Yärussālam ḫddeeewäg āsihe-wa d-Bärnäbbas d-Titus.

² Ajozi-nin dağ s-Yärussālam, Mässinäg a hi-t-dd-äsnäfalälän, jeġ-t. Eżżəmmägħäg di-hen d-inušämän n-älkānisät ta t-tellät dihen, āssogħäläg-asän isälan n-Ālənžil wa xatṭabäg i-inəzzulam,[†] əffəsäräg-asän s-iyyän-iyyän isälan n-a-wa jeġ d-a-wa hi-işlän iket-net i-ad-wär-itumas ḥlxidmät wa s-iśwär jeġ-t, a jeġ bännan.

³ Jeġ-där-sän anəfham-wa-däg fäl wär-ăshħaššälän wäla däg-Titus-i där-i äddewän asəmmili n-iman-net ed əssanän a-s āgg-Ālyunan[†] a āmoos.

⁴ Wär t-illa fäw ere dd-iḍkalän isälan n-amili wäla iba-net har jere-näg dd-älmmamäsän käl-Ālyāhud iyyäd jannänen s-bahu a-s

† 2:2 2:2 — Jur-käl-Ālyāhud, ere wärän āmoos āgg-Ālyāhud s-aläşäl meġ ere wärän ilkem i-äddin-näsän, iket-net, ānäzzalim a āmoos. A-wen-däg a fäl tiwsaten ti iyyädnien iket-näsnat, ti n-inəzzulam. — Ašäl-i-däg, ānäzzalim, ākafär (ere wärän issen s-Mässinäg). † 2:3 2:3 Gərik (Grec) däg-Təfränsit.

ălmässexitän a āmoosän, ad-tattärän asəmmilinet măšan, nəlmäd šik a-s a-wa inaramän hanäg-dd-əjjašnen i-ad-zəjjəzzən ajäraw n-iman wa hanäg-ikfa YisaĀlmasex a-s nomän sär-s. Nəlmäd a-s wär təttärän ɣas ar ad-näj ässäk däg-əlləllu wa nəjräw, aləsän-anäg asəkkəlu i-alämär wa n-ənnäbi Mosa.

⁵ Äddinät-en-däg, wär hasän-noyya iman-nänäg s-äkall, nəssəkfär-asän iman-nänäg, nunjäy s-a-wa sägren i-ad-täqqayməm kāwāned tətṭafäm Älənžil-i āmoosän tidət ta s-tärdäm.

⁶ Däg-taximit-nänäg-ten-däg, ad-ənnän meddən wi n-inušämän n-imizärän, kud-däg, s-iman wi-nin, wär-äkkuläg d-a-wa āmoosän ed Mässinäg, wär-idəkkəl äddinät s-əddəkuđ wa däg-tän-jän imidiwän-näsän, hakd a-wen-däg, wär t-illa ässäk jan däg-a-wa sägreq,

⁷ ənn-ak, ārdän iket-däg-näsän a-s näkk, ikkəlläf-ahi Mässinäg axäṭab n-Älənžil i-inəzzulam-i wären əja amili härät s-əmmək wa s-ikkəlläf Bəṭrus d-a-wen i-käl-Ālyāhud-i ɣur-āmoos amili härät.

⁸ Əfhämän iket-näsän a-s tärna n-Mässinäg ta hi-jät däg-tənnəmušəla n-Älənžil i-inəzzulam, ənta dağ a jät Bəṭrus däg-tənnəmušəla-net i-käl-Ālyāhud.

⁹ Däg-edäwänne-nin d-inušämän, irda Yaqub d-Bəṭrus d-Exya-i āmoosnen imizärän wi əssämnen n-ălkänisät a-s näkk-däg, ikf'-ahi Mässinäg turhajät n-ad-äjäg isälan n-Älənžil-net i-inəzzulam. Ɣur dihen-däg ad-där-näg jän näkk d-Bärnäbbas ifassän n-ălxer, nänmärda

där-sän i-ad-näkk näkkäneđ inəzzulam, əkkən əntäneđ käl-Älyähud.

10 Härät iyyän a där-hanäş-äsmätärän, ənnän-anäş: «Wär hin-tëttewäm tiläqqiwen n-älkänisät ta hät Yärussälam». Ämoos a-wen-däş däş-näş əttärän a däş-əkneş əjjəluyät därät-a-wen.

Āsmäqqa Buləs fäll-Bətrus

11 Təglä tanfust hundäş har aşäl wa dd-osa Bətrus aqrəm wa n-Intyuš. Indär-ahi dihen anəfham här-s ed iwar-t uđlem däş-a-wa ija

12 fäl-a-s iket-di dd-tisən meddən dd-äshimaşäl Yaqub, itihär imənsiwän d-älmassexitän wi wären ämoos dägg-Älyähud mäşan, osän-dd inämmaşalän n-Yaqub şas, imäl ənta s-edes şund käla wär-inhey älmässexitän-win-däş, äbas här-sän itihär wäla imənsiwän a-wa-däş has-təja tuksəda n-a-wa he-ənnən käl-Älyähud wi jännänen ifrad amili fäll-äddinät iket-näsän.

13 Ənhäyän käl-Älyähud wi iyyäden n-älmassexitän a-wa ija Bətrus şas, əlkämän-as əntäneđ-däş har dd-iha ilkam-asän Bärnäbbas iman-net däş-təlmənufäşa ta ijjäş Bətrus.

14 Ənhäyäş a-s ifraş Bətrus i-tidət n-a-wa inna Älənžil şas, äxtäläş-t dat-äddinät iket-näsän, ənneyş-as: kunta käyy-i n-ägg-Älyähud təlkamad i-agna wa s-əlkämän inəzzulam, ənd'-e-d-il' əmmək əmära-däş, ad-təttärəd däş-inəzzulam ad-ilalän agna wa n-käl-Älyähud?

Immun s-Yisa Älmaseş şas a ixalläsän ägg-adəm

15 Tidət, s-alăşäl-däg, dägg-Älyähud a nămoos, wär hanăg-iha ašni n-tiwsaten ti n-inęzzulam wären əssen s-alämär n-Mässinäg

16 măšan, hakd a-wen-däg, nəssan a-s ăwadəm, immun s-Ýisa Ālmasex ɣas a t-ihakkän idəm dat-Mässinäg wădden amişəl n-a-wa innă alämär wa n-ănnăbi Mosa kud-irha itṭaf-t iket-däg-net. A-wen-däg, a făl näkkäned-däg, nomän s-Ýisa Ālmasex i-ad-hanăg-äkf immun-nänäg săr-s idəm dat-Mässinäg wădden imärkedän-nänäg ed wär t-illa ăwadəm madän-ijrəw idəm ɣur-Mässinäg făl-a-s innin ămešäl a-wa innă alämär wa n-ănnăbi Mosa.

17 Näkkäneđ, Ālmasex a-s nətattär ad-hanăg-ijrəw idəm ɣur-Mässinäg măšan, kunta hakd a-wen-däg iket-net, ăffukkär-dd a-s nămoos inăsbăkkadăń, ajăń a-wen älmăgna-net a-s Ālmasex a hanăg-ăssodăń däg-ibăkkadăń-win-däg? Xăša!

18 Ädduuttät a-s afăl dd-ăqqălăg alämär wa n-ănnăbi Mosa wa ăbbotălăg, ad-janneğ i-iman-in, ăddooobeg amişəl-net, a-di, uđlem ɣas a sawarăg iman-in ed a-wen wär-ămmukkăń.

19 Alämär, iman-net a hi-madän-ăng i-ad-ăbas əddarăg i-alämär, ănn-ak, Mässinäg a-s əddarăg.

20 Năkk, ohărăg d-Ālmasex atwəsləb wa ătwăjja făll-tajəttewt, kunta ămăra əddarăg, ăbas năkk a iddarăń, Ālmasex a iddarăń däg-tağəssa-nin. Tämudre-nin däg-ăddunya-ta-däg, jey-tăt däg-təssəba n-immun wa jey s-Rure-s n-Mässinäg-i hi-ijăń tărha-ta-däg făl ămmut däg-

təssəba-nin i-ad-ăyləsăx.

²¹ A-wen-dăx a făl wär-ärdey sibət̄ulăx
ănnuğmăt wa hi-ikfa Mässinăx ed ädduuttat
a-s ənnär ihakk amişəl n-alämär wa n-Mosa
idəm ځur-Mässinăx, adiš Älmasex-i-dăx, ämmut
bănnan.

3

Älyädalat wa ilän älfäyda yur-Mässinăx

¹ Ya käl-Gälasya! Ajän kăwăneq iba n-tayötte
a kăwän-irmäsän? Mi kăwän-äkrakawän i-ad-
täqqəläm dərät Yisa-i s-hawän-nəffəssär äddälil
wa făl ätwäslăb făll-tajöttewt?

² Sastanăx-kăwän ămăra: amişəl n-a-wa innă
alämär mey immun s-Älənžil-i s-tăsjădăm a
kăwän-ikfän Unfas Šaddijän?

³ Ajän kăwăneq irmas-kăwän iba n-tayötte
ogdăhän d-a-wen-dăx! End'-e-d-il' əmmək a-
s a-wa təssəntäm s-tărna n-Unfas Šaddijän,
tăsbăttäläm-t-in har dd-täqqəläm ămăra,
tăsifalläm făll-iman-năwän?

⁴ Yas kăwăneq a-wa-dăx dd-tokayım iket-net
dăx-immun-năwän, wär t-illa a kăwän-ikfa dăx-
tayötte? Wär il' əmmək a-wen!

⁵ Ak Unfas Šaddijän wa kăwän-ikfa Mässinăx
d-tikunen ti ija jere-wän, ma tordam, mafăl ija
a-wen-dăx iket-net jere-wän? Ak ajän tordam
a-s amişəl-năwän i-alämär n-ănnäbi Mosa a făl
hawän-ija a-wen mey a-wa s-innin tomänäm s-
Älənžil-i s-tăsjădăm?

⁶ Ektəwät-dd mäjrăd wa innă Mässinăx făll-
ănnäbi Ibrahim a-s innă:
«Omän Ibrahim s-Mässinăx,

ikrăš data-s idəm.»

⁷ Älmägna n-a-wen a-s äddinät wi omännen s-Mässinäg a-s aratän n-Ibrahim wi n-tidət.

⁸ Āru d-ätwäktäb däg-əlkəttab n-Mässinäg n-a-s ilkam ad-amənän inəzzulam[†] s-Mässinäg, äkf'-en immun-näsän-en-däg idəm dat-Mässinäg. Āru d-ija Mässinäg i-Ibrahim isälan n-älxer-wi-däg a-s has-innä:

«Ad-äjäg älbäraka däg-tiwsaten
iket-däg-näsnät däg-äddimmät-näk.»

⁹ A-wen-däg a fäl ere omänän s-Visa-däg, ad-däg-s äj Mässinäg älbäraka wa ija däg-Ibrahim.

¹⁰ Däg-isälan n-äddinät wi järnen ätämä n-a-s amişəl-näsän i-alämär wa n-ännäbi Mosa a tän-madän-ixləs, əlmədnet a-s iwar-tän uđlem dat-Mässinäg, ed iktab däg-əlkəttab n-Mässinäg a-s:
«Ilgän Mässinäg äwadəm wärän
itəmişil hak ässayät a-wa ənnän
färədän wi hänən alämär wa n-ännäbi Mosa.»

¹¹ Wär t-illa äwadəm mad-äj alämär ämayğdal
dat-Mässinäg ed iktab a-s:

«Immun a ihakkän ägg-adəm idəm dat-Mässinäg
i-ad-äj tämudre ta fälla-s irha Mässinäg.»

¹² Nəssan a-s immun, wär-osey härät d-alämär ed iktab dağ däg-əlkəttabän a-s ere ämeşälän s-iqqud färədän n-alämär wa n-Mosa iket-net, ad-idđär sär-sän.

[†] **3:8 3:8** — Yur-käl-Älyāhud, ere wärän ämoos ägg-Älyāhud s-aläşäl mey ere wärän ilkem i-äddin-näsän, iket-net, änäzzalim a ämoos. A-wen-däg a fäl tiwsaten ti iyyädnen iket-näsnät, ti n-inəzzulam. — Aşäl-i-däg, änäzzalim, äkafär (ere wärän issen s-Mässinäg).

¹³ Iwar-anāğ uđlem dat-Mässināğ ed indär-anāğ ad-nămašäl a-wa innă alämär măšan, osădd Älmasex ɣas, äsdärfät-anāğ däğ-tilgant ta hanāğ-äswär, iđkäl-tät fäll-iman-net, ämmut i-ad-näyləs ed iktab a-s:

«Ilğän Mässināğ ăwadəm
ătiwăslabän fäll-tajettewt.»

¹⁴ Tamättant ta ija ɺisa fäll-tajettewt, ij'-et i-ad-ənmiwədän inəzzulam däğ-idəm-net d-älbäraka wa s-ijjāš Mässināğ ärkawäl-net i-Ibrahim, nəjrəw dağ näkkäneđ-i sär-s omännen Unfas Şaddijän däğ-təssəba n-ɺisa Älmasex.

Ärkawäl wa ijjāš Mässināğ i-Ibrahim

¹⁵ Ärheey ayətma ămăra, ad-hawän-ăffässäräy isälan-wi-däğ s-älmital iglan fäll-agnatän wi däğ-nänäy: təssanäm a-s ed iktäb ähaləs täkarde däğ-ija isälan n-əmmək wa s-mad-tużan täkasit ta dd-mad-äyy, afäl issəmda akätab-net, iğfäl-tät, ad-äbas t-illa ere äddooben asiwəđ wäla afänaz n-a-wa s-işwär iktäb-t.

¹⁶ Əmmək-wen-däğ dağ a-s ijjāš Mässināğ ärkawälän-net i-Ibrahim d-ahäya-net. Əjrähät-in a-s wär-innă əlkəttab:

«Ad-där-k əjjəşäy ärkawäl käyy d-ihäyawän-näk.»

A innă: «Käyy d-ahäya-näk», i-ad-əlmədän äddinät a-s ăwadəm iyyän ɣas a-s iha Mässināğ ti-net, a t-ämoosän Älmasex.

¹⁷ Əmăra, ălmägna n-a-wen, ənta da: Mässināğ, ijjāš d-Ibrahim ärkawäl n-tassayt, şämad okaynät əkkozät timađ d-käradät timərwen

n-awātay ad-dd-äzzäbbät Mässinäγ alämär wa n-ännäbi Mosa fäll-käl-Älyähud, ämära, alämär-wen, wär-äddobät ad-hin-ikkəs ärkäwäl wa s-išwär ijjäš-t Mässinäγ s-tizarät.

18 Ənnär ija a-wen, adiš, ma ija ärkäwäl wa s-išwär ijjäš-t Mässinäγ i-Ibrahim? Nəssan a-s Ibrahim, issətbät Mässinäγ ärkäwäl wa has-ijjäš, wadden s-alämär mäšan s-tənna-net ed Mässinäγ iman-net a has-innän:

«Ad-käy-äkfäγ ännyymät-in.»

>Addäil wa fäl dd-äzzäbbät Mässinäγ alämär

19 Alämär, adiš, ma infä? Alämär, temähiđt hanäγ-salmadät a-s näkkäneđ-i-däγ, inäsbäkkadän a nämoos ämiijatärnen s-tenäšše hundäγ har ašäl wa dd-mad-ass ahäya n-Ibrahim wa s-ätwänna ed ənta-en-däγ a-s ijjäš Mässinäγ ärkäwäl-wen-däγ. Alämär-en, təssanäm a-s änjalosän a t-dd-äwwäynen s-ännäbi Mosa-i t-dd-äwwäyän s-tamötte ta jer-imäl d-Mässinäγ.

20 Däγ-ärkäwäl wa ijjäš Mässinäγ d-Ibrahim, wär t-illa ere imalän jere-s d-Ibrahim ed Mässinäγ, ənta γas a ijjäšän ärkäwäl-wen-däγ i-Ibrahim wäla əssəbab wäl' iyyän.

21 A-wen ak älmäγna-net a-s alämär wa n-ännäbi Mosa, ill'-e a-s änimäšräy i-ärkäwäl wa ijjäš Mässinäγ? Äbo, wär-ämmukkän a-wen ed ənnär t-illa alämär äddooben ihuk n-älzännät, əjrəwän-t äddinät, aj'-en alämär-en-däγ äddinät əjrawnen idəm dat-Mässinäγ

22 mäšan, illäγät-anäγ əlkəttab n-Mässinäγ a-s äddunya iket-net a t-təllat daw-tärna n-abäkkad,

ămoos a-wen a itbatän däg-tëssëba n-ad-
ejrëwän äddinät wi omännen s-Visa Älmasex a-
wa s-hasän-ijjäš Mässinäg ärkawäl-net.

23 Ămära, dat-azzäman wa dd-issäryäas
Mässinäg immun s-Visa Älmasex, alämär wa
n-ännäbi Mosa a däg-näg ännihädän, nämoos-
as šund käl-takärmut ikna uđef däg-tišem-net,
ännihäd däg-näg hundäg har ašäl wa dd-
asnäfaläl Mässinäg immun s-Älmasex.

24 A-wen, isalmad-anäg a-s alämär wa n-
ännäbi Mosa, tayälift a hanäg-ija; ixlaf-anäg i-
azzäman wa dd-mad-ass Älmasex i-ad-hanäg-
äkf immun-nänäg idem ȝur-Mässinäg.

Ušreyän n-immun s-Mässinäg

25 Ămära-däg d-nøjjäš äzzäman wa n-immun,
ăbas fälla-näg ila änaxlaf-en tärna

26 ed ȝur-ašäl-wa-däg d-tomänäm, tämoosäm
aratän n-Mässinäg däg-tëssëba n-Visa Älmasex,

27 ənta-i s-isäm-net a däg-tätwäsälmäyäm däg-
aman, ämoos a-wen a ässiitbätän tassayt-näwän
där-s, tärmasäm day älkal wa irmas Älmasex.

28 Ămära-hi, ăbas izlay wa n-ägg-Älyahud d-
wa n-Älyunan, ăbas izlay wa n-eläll d-wa n-
akli, ăbas izlay ähalës d-tamädt ed tämoosäm
iket-däg-näwän iyyän n-äwadäm däg-tëssëba n-
tassayt-näwän d-Visa Älmasex.

29 Yas, şämad Visa Älmasex a kawän-ilan, adiš
tämoosäm ihäyawän n-Ibrahim, ad-tejrëwäm
täkasit ta s-hawän-ijjäš Mässinäg ärkawäl-net.

4

Azäjor n-əkkəlu s-ajäraw n-iman

¹ Ārheeg dax däg-edägg-wa-däg, ad-käwän-äknäg asəssəjrah n-a-wa s-ärheg tənna-net: wädden ara s-ilkam ad-ikus ti-s, a ikka wär-ikreš tayötte, wär-izley d-akli n-mässi-s kud-däg wär t-ih' ässhäk a-s a-wa ila abba-net däg-ehäre iket-net, i-net.

² A ikka ämoos ara əndärrän, ad-ila imännähädän d-älwäkilän has-janen ənniyät ənta hakd a-wa ila iket-net. Ad-ijs a-wen-däg hundäg har ašäl wa d-ikkäs abba-net ässhäk a-s rure-s, ämoos ähaləs ilan tanhaqt ämära.

³ Sund a-wen-däg a fälla-näg ijan näkkäned-däg, noläh d-aratän s-käla äkkilen i-tärna ta fäll-tegl' äddunya

⁴ mäšan, täwwäd-dd täqqän ta issəbdäd Mässinäg yas, äšmašäl-dd sär-näg Rure-s toraw tamädt i-ad-izzäg jere-näg, ämašäl ənta-däg a-wa innä alämär wa n-käl-Älyähud,

⁵ a-wen, ij'-e Mässinäg däg-təssəba n-ad-isəddärfət äddinät wi əzzägħnen daw-alämär-wen-däg, äkf'-anäg dax näkkäned turhajät ta n-tumast n-aratän-net.

⁶ Tidət-däg a-s aratän-net a tämoosäm ed tasətbat n-a-wen, a tät-ämoosän, Unfas Šäddijän n-Rure-s n-Mässinäg wa ija däg-ulhawän-nänäg. Unfas-net-en-däg a hanäg-ijrāwän s-ad-nəgħarr Mässinäg s-isəm: Abba.

⁷ A-wen-däg a fäl, äbas tämoosäm ekla, ännak aratän n-Mässinäg a tämoosäm. Yas šämad

aratän n-Mässinäg a tāmoosäm, adiš, tāmoosäm iməkkusa wi s-irh' ālixer iket-net.

Isəmməterän wi ija Buləs i-käl-Gälasya

⁸ Ibda, a-s wär təzzeyäm Mässinäg, ăşşänämän-i n-mälayägna ȣas a-s tăkkilem, ȣabbădäm-tän

⁹ măšan, ašäl-i d-təzzeyäm Mässinäg, ănnak, ănnäjet, ašäl-i d-kăwän-izzäy Mässinäg, ənd'-e-d-il' əmmək n-ad-taləsäm iħuk n-iman-năwän i-mälayägnatän wi făll-təgl' āddunya s-wär t-illa făw a ənfən wăla a tän-ihan, adiš kăwăneđ a tărham ad-tăqqəläm əkkəlu-wa-dăg dd-təzjäräm?

¹⁰ Ǝjrahäg-in a-s təknam asəmχar n-uđəf n-ișilan iyyäđ d-orän iyyäđ d-ăzzämanän iyyäđ d-iwətyan iyyäđ,

¹¹ ässiirmäg-ahi hullan a-wa kăwän-iślän har ămmukkän făw a-s ija ȣur-i a-s ālxidmät wa jey jere-wän, ăbboṭṭäl-in bănnan.

¹² Ayətma! Asəlyad a kăwän-tajjäg ămăra, tălălăt-ahi ed ăzzäman wa əkkäsäg əlleğ-t jere-wän, jey iman-in iyyän dăg-wän, wär-ənheyäg dağ a hi-tăgşadäm.

¹³ Təssanäm făw a-s ašäl wa äzzarän d-kăwän-in-oseğ i-ad-hawän-ăjäg isălan n-Ālənžil, a-s kăwän-in-oseğ, ărhiinäg,

¹⁴ ja tağəssa-nin tələmde-ta-dăg făl tăsijälälhäy măšan, hakd a-wen-dăg, wär hi-təkrehäm, wär hi-tăjlälhäyäm, ănn-ak, tăsbărräkäm-ahi šund ȣas änjalos n-Mässinäg a kăwän-dd-osän, šund ȣas a-s näkk iman-in a-s ȣisaĀlmasex.

15 Ma ija ālixer wa hi-təssəknäm äzzäman-wen-däg? Ma kăwän-ijrăwän? Ajän təttəwäm-in a-s äzzäman-en-däg d-kăwän-in-oseg, ārhiinäg, təssəknäm-ahi tärha-ta-däg fäl ənnär ämmukkän a-wen-däg, təkkukkərem-dd tiṭawen-năwän i-ad-hi-tänät-təkfəm.

16 Ajän tidət ta hawän-jänneg, təj'-ahi ašänjo-năwän?

17 Äddinät wi ədgäznen däg-asəmməskəl n-isälan wi hawän-nəja, wär teğalät äkkulän däg-wän, änn-ak tärha gas n-ad-kăwän-sənnəməjjəjän där-i i-ad-hasän-təlkəmäm a däg-oşalän.

18 Tidət, idgəzət äwadəm măšan, idgəzət däg-amišəl n-a-wa olägän. Näkk, ässofäg ad-tamaşaläm a-wa olägän s-älwäqq iket-net jer-elleg ɣur-wän wäla wär ɣur-wän t-elleg.

19 Ilyadän-in, ässiilmädäg-kăwän a-s ozaräg däg-təssəba-năwän, ijmad-t ässäk day a-s jeğ tiżżurt ta tħej tamädt jarrawät eġaf-net, tiżżurt day ta jeğ, ad-tät-ətħafäg hundäg har ašäl wa d-mad-ikən Ālmasesx äntum däg-ulhawän-năwän.

20 Äsiidärhänäg ad-t-elleg ɣur-wän ässaxgħat-wa-däg i-ad-hawän-ajäg mäjräd säl wa-däg fäl-a-s iqqan eġaf-in fäll-təmġäre n-asəmmäxəlxel-i-däg hi-ija a-wa kăwän-işlän.

Ālmital dd-ātiwädkälän fäll-tanfust ta n-Saräta d-ta n-Xăžräta

21 Āyyät-ahi ad-kăwän-səstənäg kăwăned-i ədgäznen s-əmmək-wa-däg däg-utär n-amišəl n-a-wa innä alämär wa n-ännäbi Mosa. Ak ajän təknam faw teğäre n-a-wa innä?

22 Wädden, iktab däg-s a-s ikräš Ibrahim əssin ilyađän, iyyän, ohar-t d-Xäžräta ta n-taklit, wa iyyäđän, ohar-t d-Saräta ta n-telällit-i issäxläl.

23 Ara wa ohär d-taklit, ohär-t där-s s-əmmək-wa-däg s-itihär ähaləs d-tamädt ara mäšan, ara wa ohär d-telällit, ämoos ara n-ärkawäl wa ijjaš Mässinäg i-Ibrahim.

24 Tanfust-ta-däg jät fäll-tideden-ti-däg n-sänatät, la älmägna šejreen, älmägna-net da: tideden-ti-däg n-sänatät, änifäqqänät d-ärkawälän wi n-əssin: Ärkawälän-en, wa äzzarän, tamätart-net, Xäžräta; a-wen ärkawäl wa ijjaš Mässinäg d-ännäbi Mosa fäll-adag wa n-Säynay, wen ärkawäl, a-wa t-dd-ijmäđän däg-aratän iket-net eklan ed Xäžräta-i n-ma-sän, taklit.

25 Xäžräta-en-däg a-s šund adag wa n-Säynay ihän äkall wa n-arabän, tooläh dag d-agrəm wa n-Yärussälam-i s-ašl-i-däg, məssaw-s iket-däg-näsän, äkkiilen härwa i-alämär-en-däg.

26 Mäšan, Yärussälam ta n-tidet t-tellät ḡur-Mässinäg däg-išənnawän, ənta a-s tamädt ta n-telällit n-anna-nänäg.

27 A-wen-däg faw a fäl iktab däg-isälan n-tamädt ta n-telällit a-s:

«Tamädt, kämm-i n-teməjjejrut, däwät,
säqqələlət dag kämm-i s-käla
wär käm-tärmes tiżżurt ta n-ajäraw n-eğäf
ed ädduuttät a-s tamädt ta tätwäksänät,
fäl-a-s innin wär tətəy,

ad-tajär ta där-ohär ähaləs-net aratän.»

28 Ayətma, əlmədät a-s käwäned aratän dd-oraw ärkawäl n-Mässinäg a tāmoosäm šund əmmək

wa s-ijjāš Mässināğ ārkawäl i-Ibrahim ḡas, ikrāš Isxaqq.

²⁹ S-əmmək-wa-däg s-ibda iwä-dd alyad wa təkräš Xäžräta, idwäl ḡas, ad-isakna wa n-Saräta aȝäna; əmmək-wen-däg day a ijan jer-äddinät har ašäl-i-däg.

³⁰ Ämära, ilyadän-win-däg n-əssin, ma hanäg-innä əlkəttab n-Mässināğ däg-isälan-näsän? Wädden iktab a-s innä Mässināğ i-Ibrahim:

«Səfəl iman-näk taklit d-rure-s ed
wär t-illa əmmək s-ohär alyad

wa n-taklit täkasit d-alyad wa n-telällit.»

³¹ Ayetma, näkkäned, anna-nänäğ telällit wädden taklit.

5

Ălmăssexitän, əjrăwän iman-näsän däg-tessəba n-Ălmasex

¹ Älmasex a hanäg-ijrăwän iman-nänäğ, nəjrăw-tän day s-ălxal imdan. A-wen-däg a fäl, əhəlät iman-năwän, wär jem iman-năwän toläs daw-ăzuk wa n-Iblis i-ad-has-täkkälem.

² Näkk Buləs, ənney-awän: afäl täsmaläyäm iman-năwän s-əmmək wa s-t-ifräd alämär, adiś, wär kăwän-e-infew Älmasex s-wäla a əndärrän.

³ Ärhey day ad-əkkəsäg äwadəm iket-net irhan ad-isəmmiləy iman-net däg-taydärt, afäl əsmaläy iman-net, əmoos-as färəd ad-ämaşäl day färədän wi iyyädnen əktäbnen däg-alämär.

⁴ Kăwäned-i tattärnen ad-kăwän-äj amişəl n-färədän n-alämär wa n-ənnäbi Mosa äddinät

lanen idəm dat-Mässinäγ, ässiilmädäγ-käwän a-s ibd'-iwän a-wen d-Visa Älmasex, äsiinämäjjäj-käwän d-ännuγmät n-Mässinäγ.

5 Näkkäned-i omännen s-VisaÄlmasex, Mässinäγ a ih' ättäma-nänäγ i-ad-hanäγ-äj imaqdalän. Ättäma-en, näqqal-as s-tazidert ta ihakk Unfas Šaddijän-i s-ənta a ässixdämän immun-nänäγ.

6 Äwadəm, afäl išwär irtäy d-Visa Älmasex, wädden amili wäla iba-net a infan härät, a-wa infän härät, immun d-asətbat-net s-tärha-nänäγ i-äddinät.

7 Änna säbxas yaden, uhən käwäned-i s-a ija a-wa-däγ tosasäm däγ-azzal wa n-immun s-əmmək-wa-däγ, ma käwän-dd-iwwäγän, igdälawän amişəl n-tidət?

8 Erk ənniyät-wen-däγ, wädden Mässinäγ-i käwän-dd-iγrän s-iman-net a dd-ifal,

9 ajän təttewäm-in a-s täz̄za əndärrät a sakafät ejel n-älkäma äjjeen.

10 Näkk, ikf'-ahi Emäli däγ-isälan-näwän tafləst n-a-s wär-e təjəm γas ar inəzjam šund wi jey mäšan, ärheey ad-təssanäm a-s äwadəm wa itattärän uγən n-iγäfawän-näwän, ilmədet a-s ad-t-irməs Mässinäγ ed anməšri šund-wen-däγ, wär sär-s izley Mässinäγ äddinät.

11 Ayətma, däγ-a-wa hi-dd-iqqälän näkk, ənnär isälan wi täjjäγ, əfrađäγ fäll-äddinät amili, adiš mafäl hi-tiγəzzuben käl-Älyāhud bännan? Ənnär a-wen-däγ a xatṭäbäγ, iket-di, wär tumas tajəttewt ta fäll-ämmut Älmasex älmuxal i-äwadəm wäl' iyyän.

12 Ărheey dăg-ăddinăt wi kăwän-šaškanen ad-kăwän-ĕkfən ălçafyät kud-ărhan ădarät-a-wen, səmməkədməkədän iman-näsän.

A-wa ibdan ere iddarän i-tayəssa d-ere iddarän s-Unfas Šaddijän

13 Ayətma, ajäraw n-iman-năwän a-s kăwän-dd-iğra Ālmosex s-iman-net, wär tăjjät a-wen ăsaru făll-hakkäm iman-năwän abăkkad, ănnak, kunta ill'-e a dăg-wän itanăhadän, umaset tanmədhalt jer-iman-năwän dăg-tărha

14 făl-a-s alämär wa n-ănnäbi Mosa iket-net, ăkilawkälaw-t-dd măjrăd wa innän:

«Ăj i-ănhăraj-năk tărha-ta-dăg jed i-iman-năk.»

15 Măsan, afăl dd-tăqqäläm tănifăqqäm d-iwăşsan, tinmədidäm, tinməkşim jer-iman-năwän, dihen, ăjät ənniyät i-ad-wär tənməlhisäm jer-iman-năwän.

16 Ayyät Unfas Šaddijän ad-ănnähăd dăg-wän, dihen, ad-ăbas təlkamäm i-erk derhanän n-tiğəswen-năwän.

17 A-wa lăbasän isadărhan ăgg-adəm, iknas Unfas Šaddijän; Unfas Šaddijän day iknas a-wa lăbasän isadărhan ăgg-adəm. Wär kăla imda akənnas wa n-jere-sän, a-wen-dăg a dd-orăwän a-s, wădden a dd-ijjăşän eğăf n-ăwadəm-dăg, ad-t-ăj.

18 Afăl Unfas Šaddijän a dăg-wän ănniihădän, wär dăg-wän-e-ănnähăd alämär wa n-ănnäbi Mosa.

19 Erk imojjan wi lăbasnen itamaşal ăgg-adəm, wär-ĕfferän, ătiwăssanän, əntăneđ da: əlkăxbu, iba n-təşədjə, asəmmădəs n-iman,

20 ālgibadät n-ăşşänämän, əkkəriku, amşənji, akənnas, tismiten, asjət n-ađkär, tärha n-mijraw, băddo-băddo, ejhän-ejhän,

21 munkäzi, tesäse n-asməd, täruf d-a äjjeen wärän izley d-a-wen-däg. Ěkkasäg-kawän däg-taydärt s-əmmək wa s-käla hawän-t jey, ənneğ-awän: äddinät wi tamaşalnen härätän-win-däg, xäram-asän ujəs n-Təmmənəya n-Mässinäg.

22 A-wa olägän dd-itirəw Unfas Šäddijän s-ulh n-ägg-adəm ənta da: tärha, tedäwit, älixer, tazidert, tähänint, milğaw, immun,

23 tätzude, tanhaqt däg iman. Härätän-win-däg, wär tän-iha-i iknas alämär.

24 Äddinät wi əkfänen iman-näsän Yisa Älmasex, əsläbän fäll-tajettewt ta fäll-ätwäşläb Yisa derhanän-näsän wi läbasnen tän-əlwaynen.

25 Šämad Unfas Šäddijän a däg-näg ännihädän, adiš, näyyet-t day ad-ännähäd däg-tämudre-nänäg s-a-wa olägän.

26 Wär nətumaset äddinät tabäräjnen wäla tinməkənżernen jer-iman-nänäg, wär-itisəmet wäl' iyyän fäll-a ila amidi-net wär ila.

6

Isəmməterän wi n-ajilal

1 Ayətma, ārheeğ däg-wän, kawäned-i däg-ənnihäd Unfas Šäddijän n-Mässinäg a-s, e-d tärmasäm əwadəm iğsadän härät, səssiğədät s-ənniyät əzedän, wär t-täxweläm. Käy day i t-isasaxadän, aj ənniyät i-iman-näk i-ad-wär tođed däg-abäkkad şund wa däg-ođa.

² Idkəlet hak iyyän däg-wän äzuk wa ällinjät amidi-net, dihen, ad-tämašäläm alämär wa n-Älmasex.

³ Ere ordän iman-net härät-däg, a-s ija a-wen, wär-ämoos wäla a əndärrän, ilmədet a-s iman-net ḥas a isaswad,

⁴ isshəket äwadəm imojjan-net təzzar isshək wi n-äwadəm iyyän, dihen kunta ihannäy fäll-iman-net a äniihäßjän d-təmmal, adiš aməlet iman-net s-a-wen-däg, mäšan, wär-itäjjet fäw əmmək s-äsnäfäqqə iman-net d-äddinät wi iyyädnen,

⁵ fäl-a-s, hak äwadəm ad-itwəsəstən d-äzuk n-a-wa ämešäl.

⁶ Wi kawän-saygranen mäjräd n-Mässinäg, ifraq fälla-wän ad-där-sän tahərəm a-wa s-kawän-irxäm Mässinäg iket-net.

⁷ Wär tækärrasät iman-näwän, Mässinäg, wär t-itəjj äwadəm tekäškäst, wär-e aləy äwadəm ar a-wa äddomät:

⁸ wa s-tägəssa-net ḥas a-s ixdam derhan-net, ad-sär-s dd-arəw a-wa itamašal əlhəllak mäšan, wa s-Unfas Šäddijän a-s itamašal derhan-net, ad-sär-s dd-arəw a-wen tämudre täglalät.

⁹ Wär hanäg-itäjjäset sendad n-amišəl n-a-wa olägän ed, afäl dd-tosa täqqän ta issəbdäd Mässinäg, kunta wär sämmed fälla-näg iji n-a-wa olägän, ad-nəjrəw älixer n-a-wa nəjä.

¹⁰ A-wen-däg a fäl ämära, iket-di nəjraw s-a-wen, ihəlet milgaw-nänäg ebre n-e d t-illäm äwadəm hullan ebre n-wi där-nohär immun.

11 Enhəywät təşshuhärt n-akätab däg-edägg-wa-däg i-ad-təlmədäm a-s näkk iman-in a hawän-in-iktäbän tåkardé-ta-däg.

12 Äddinät wi tattärnen ad-hawän-əjən amili färəd, əjrähät-ah'-in ɣas a wa tän-išlan, wär-ərhen ahänay n-axäna, a-wen-däg a fäl, wär helän ad-ənnən i-äddinät a-s əlyəllas wär-iha ar tajəttewt ta fäll-ämmut Älmasex.

13 Təzzar dag äddinät-en ətṭäfnen amili, əjrähät-in ɣas a-s əntäned iman-näsän, wär təmišilän färədän n-alämär iket-net, jan däg-sän nefran, wär fälla-wän əfredän amili ɣas ar dägtärha n-ad-äbbäräjän n-a-s əntäned a ămoosnen əssəbab n-amili-näwän.

14 Näkk, wär t-illa a jey abäräj kunta wädden tidət ta n-a-s Emäli-nänäg Visa Älmasex, ämmut fäll-tajəttewt. Tamättant dag ten-däg ija a tåmoosät əssəbab wa fäl sär-i oläh a-wa-däg ihän äddunya-ta-däg şund a ämmun, olähäg-as dag näkk d-ere ämmun.

15 Wädden amili wäla iba-net a-s härät, tumast n-äwadəm ässiynäy Mässinäg a-s härät.

16 Ettaräg s-Mässinäg, ad-äkf älxer-net d-tähanint-net i-e d t-illäm ere ilkamän i-a-wa ənneğ, ijräw dag a-wen i-e d t-illäm ere ihan Işrayil wa n-Mässinäg.

17 Ettaräg däg-wän, käwäneq ašäl-i-däg, ad-wär däg-wän itiləs äwadəm asəsnan n-iman-in, əgdähän-ahi ibuyəsän-wi-däg äşşıwälnen təgəssa-nin s-əntäned a-s tajuhe n-a-s näkk, il'-ahi Visa.

18 Ayətma-ɣ däg-äddin, ähuuläg-käwän-in,

əttarăꝝ day dăꝝ-Emăli-năňăꝝ ɿisa Ălmasex, ad-
ăj ănnuꝝmăt-net dăꝝ-ənniyăt-năwăń. Amin!

**Ălənžil n-Visa Ălmasex: Kitab Ălmuqăddăs
Tamasheq: New Testament**

copyright © 2003 Wycliffe Bible Translators, Inc.

Language: (Tamasheq)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 18 Apr 2025 from source
files dated 29 Jan 2022
b95f369b-a236-5ca8-8cab-11f74279d73c